



PCN ta logra duna indeksashon kompletu pa subida di preis na 2023

Fondo di Pension di Hulanda Karibense (PCN) ta duna un penshonado i partisipante aktivo un indeksashon di 1,7% entrante di promé di yanüari 2024. Ku esaki, e fondo ta kompensá di forma kompletu pa subida di kosto di bida durante e aña ku a pasa.

E fondo konosé un sistema di indeksashon kondishonal. Esaki ta nifiká ku ta kompensá pa subida di preis, ora e situashon finansiero di e fondo ta permití esaki. Den práktika e fondo ta tuma subida di preis segun sifranan di CBS entre e luna di sèptèmber di un aña i luna di sèptèmber di e próksimo aña komo punto di salida.

Tambe ta kalkulá un promedio di subida di preis ku ta registrá na Saba, Sint Eustatius, i Boneiru, relativo na e kantidat di habitante na kada isla. Desaroyo di preis a varia bastante fuerte na e tres islanan, durante e aña tras di lomba. Preisan a subi 2,8% na Saba i 1,9% na Boneiru entre sèptèmber 2022 i sèptèmber 2023. Na Sint Eustatius, den e mesun periodo preisan a baha levemente ku 1,1%.

E indeksashon ku PCN ta duna awor, ta e di dos den un periodo relativamente kòrtiku. Na sèptèmber 2023, PCN ya a duna un indeksashon interino di 3%.

Interés i invershon

E fondo di penshun a komuniká ku por duna un kompensashon kompletu, debí na un tasa di interés ku ta subi konsiderablemente durante 2023, i resultadonan favorabel di e invershonnan di e fondo. "Ounke e aña tabata algu volátil, PCN a probechá hopi di un tasa di interés ku a subi konsiderablemente, kombiná ku resultado positivo di e invershonnan. "Esaki no solamente a duna nos e posibilidat pa ortogá un indeksashon kompletu, pero ta nifiká tambe ku e fondo a terminá aña 2023 ku un grado di kubertura hopi saludabel di 128,3%," asina presidente di PCN, Harald Linkels a splika.

Un grado di kubertura di 128% na forma simpel spliká ta nifiká ku pa kada dòler na obligashon, PCN tin un dòler i 28 sènt den su pòtmòni.

E montantenan nobo di penshun lo wòrdu pagá pa di promé biaha na fin di yanüari 2024.

